



Anwar menyampaikan ceramah pada Bicara Perdana di Tanah Merah.

Pembohongan pemimpin PAS akan dibongkar: Anwar

> Pendedahan berdasar fakta, bukan fitnah

Oleh Mohd Zulkifli Zainuddin
mohd.zulkifli@nstp.com.my

>TanahMerah

Presiden PKR, Datuk Seri Anwar Ibrahim berkata, beliau akan mendedahkan pembohongan dilakukan pemimpin PAS sedikit demi sedikit, termasuk isu pembayaran RM1.4 juta oleh parti pembangkang itu kepada Editor *Sarawak Report*, Clare Rewcastle-Brown.

Menjawab kenyataan oleh

pimpinan PAS sebelum ini, termasuk Presidennya, Datuk Seri Abdul Hadi Awang yang menegaskan tiada bayaran dibuat kepada Rewcastle Brown, Anwar berkata, pendedahan yang dilakukannya akan disertakan bersama fakta.

"Selama berada dalam penjara, saya kena kutuk oleh pemimpin PAS terutama (dakwaan) saya menjadi alat DAP, tapi saya hanya berdiam diri. Kini tiba masanya saya jawab berdasarkan fakta.

"Apa yang berlaku sekarang terdapat penipuan dan saya akan bongkar cerita sikit-sikit, koho-koho (perlahan-lahan). Tak boleh deras (cepat) semua sekali. Kalau mereka boleh bohong sekali, mungkin kes lain saya tak tahu lah macam mana," katanya pada Bicara Per-

dana, di sini, malam kelmarin.

Beliau berkata demikian sebagai mengulangi isu pendedahan penyelesaian saman Abdul Hadi terhadap Rewcastle-Brown di Mahkamah Tinggi London, baru-baru ini.

PAS beri penjelasan sebaliknya kepada ahli

Pada Februari lalu, Anwar yang juga Ahli Parlimen Port Dickson mendedahkan Presiden PAS itu membayar RM1.4 juta kepada Rewcastle-Brown, malah perkara itu disusuli dengan pendedahan Editor *Sarawak Report* yang mengesahkan penerimaan bayaran terbabit.

Mengulas lanjut, Ahli Parlimen Port Dickson itu, berkata beliau hairan melihat pemimpin PAS yang mengetahui per-

kara itu, tetapi sanggup berbohong dan memberi penjelasan yang sebaliknya kepada ahli parti itu.

Katanya, beliau membuat pendedahan itu berdasarkan fakta, bukannya sekadar memfitnah selepas melihat sendiri salinan dokumen serta cek bayaran terbabit.

"Mereka kata bukan PAS bayar, tapi (Pengerusi Keretapi Tanah Melayu Berhad) Datuk Rameli Musa yang bayar. Tidak kiralah siapa yang bayar tapi ikutkan perjanjian itu, PAS setuju untuk bayar.

"Saya lihat salinan cek itu sebelum buat kenyataan. Apa makna semua ini? Saya tak sahkan orang yang tak tahu, tapi yang saya pelik pemimpin PAS yang tahu masih sanggup membuat penafian," katanya.